

Il Grischun ha ina regenza giuvna

Nua regian ils pli vegls e pli giuvens en Svizra?

DA CLAUDIA CADRUVI / ANR

■ **Il Grischun ha la pli giuvna regenza da la Svizra orientala. 49 onns han ils tschintg cussegliers guvernativs en media.** *Stefan Engler* e *Claudio Lardi* èn già diesch onns en uffizi. Era *Martin Schmid* è già dapi sis onns en la regenza e posseda blera experientscha. Tuttina èn ils commembers da la regenza grischuna ils pli giuvens da la Svizra orientala e vegnan en media mo sin 49 onns.

5 chantuns senza dunna en la regenza

Da preschent han suandants chantuns naginas dunnas al guvern: Appenzell dadens, Sviz, Genevra, Turgovia ed Argovia. Ma tut quests chantuns han già già ina giada almain ina dunna en la regenza.

Genevra ed Appenzell dadens han omadus già cusseglieras guvernativas che han fatg in grond sigl da carriera. A Genevra è *Micheline Calmy-Rey* stada en il conseil d'état. Ad Appenzell dadens ha *Ruth Metzler* timunà in departament.

Main fortunada è stada la sulletta cussegliera guvernativa dad Argovia, *Stéphanie Mörkhofer*. Ella n'è betg pli vegnida reelegida il 2000. *Margrit Weber-Röllin* ha remess il 1996 a moda regulara ses uffizi en la regenza da Sviz. Suenter n'hai dà nagina dunna pli en quest chantun.

A Turgovia ston ils umens reger mo anc paucs dis senza dunna. L'entschatta zercladur entra *Monika Knill* en uffizi. Ella vegn ad esser la segunda dunna en il guvern turgovian.

Ils Glarunais èn puncto «giuven-tetgna» sin il haltgogns als Grischuns, els èn en media be 0,6 onns pli vegls ch'ils collegas grischuns ed han 49,6 onns.

La liga dals chaus alvs

Lura cumenza en la Svizra orientala già la liga dals chaus alvs, pia quella cun regenzas da sur 50 onns. Ils cussegliers guvernativs da Turitg e dals dus Appenzells èn en media tschintg onns pli vegls ch'ils collegas grischuns e glarunais. A Son Gagl ed a Turgovia han ils cussegliers guvernativs radund 58 onns ed èn pia bunamain diesch onns pli vegls ch'ils Grischuns.

Las pli veglias regenzas sa chattan geograficamain amez la Svizra. Argovia ha ina regenza da 61,8 onns, ed a Sutsilvania ed a Soloturn vegnan ils politichers da l'executiva en media sin 58 onns.

La pli giuvna glied da la Svizra centrala han Zug e Berna. Là han ils cussegliers guvernativs en media 48 onns u 48,8 onns.

La pli giuvna regenza ha il Vad

La pli giuvna regenza in summa en Svizra ha il chantun Vad. Ils tschintg cussegliers guvernativs e las duas cusseglieras guvernativas da Vad han en media mo 46 onns. Sulet *Jean-Claude Mermoud*, il schef dal departament d'economia, ha 56 onns. Il rest da la regenza ha tranter 40 e 50 onns. La raschun per quest giuven personal: Trais cussegliers guvernativs dal Vad èn pir dapi in onn en uffizi. Il pli vegl guvern en Romandia ha il chantun Neuchâtel cun ina regenza che ha en media 57,2 onns.

Martin Schmid è il segund giuven

Ils dus pli giuvens cussegliers guvernativs in summa posseda la Svizra orientala. *Rolf Widmer* ha 37 onns ed è il pli giuven dal tut. El timuna a Glaruna il departament da finanzas. Il segund giuven è Martin Schmid che ha 39 onns e maina uss il departament da finanzas grischun. Schmid e Widmer èn ils dus sulets

cussegliers guvernativs che han pli pauc che 40 onns.

Ils dus pli vegls cussegliers guvernativs han Soloturn ed Argovia. *Walter Straumann* ha 65 onns e timuna il departament da construcziun e giustizia da Solo-

turn. *Kurt Wernli* ha 66 onns e maina il departament d'economia e da l'intern d'Argovia.

La vegliadetgna dals cussegliers e da las cusseglieras guvernativas è quintada tenor l'annada.

Chantun	cussegliers	vegl. totala	media
Svizra orientala			
Grischun	5	245 onns	49 onns
Glaruna	5	248 onns	49,6 onns
Turitg	7	378 onns	54 onns
Appenzell dador	7	384 onns	54,8 onns
Appenzell dadens	7	338 onns	55,4 onns
Schaffusa	5	281 onns	56,2 onns
Turgovia	5	289 onns	57,8 onns
Son Gagl	7	506 onns	58 onns
Svizra centrala cun Berna e Basilea			
Zug	7	336 onns	48 onns
Berna	7	342 onns	48,8 onns
Tessin	5	255 onns	51 onns
Basilea-Citad	7	373 onns	53,2 onns
Uri	7	376 onns	53,7 onns
Sviz	7	379 onns	54,1 onns
Lucerna	5	275 onns	55 onns
Sursilvania	5	278 onns	55,6 onns
Basilea-Champ.	5	285 onns	57 onns
Soloturn	5	292 onns	58,4 onns
Sutsilvania	7	412 onns	58,8 onns
Argovia	5	309 onns	61,8 onns
Svizra franzosa			
Vad	7	323 onns	46,1 onns
Giura	5	245 onns	49 onns
Genevra	7	355 onns	50,7 onns
Friburg	7	377 onns	53,8 onns
Vallais	5	271 onns	54,2 onns
Neuchâtel	5	286 onns	57,2 onns

La vegliadetgna dals cussegliers e da las cusseglieras guvernativas è quintada tenor l'onn da naschientscha e betg tenor il datum effectiv.